

ლადო პაპავა - „ასუსტებენ პატრიარქს და მის უახლოეს გარემოცვას“



2017-02-27 10:00:55

„ეკლესიის გარშემო შექმნილი ვითარების სრულფასოვნად შეფასება ჯერჯერობით შეუძლებელია, რადგან ინფორმაცია ძალიან მწირი, ცალმხრივი და ხანდახან ურთიერთგამომრიცხავია. ჩემი აზრით, მზაკვრული გეგმა, რომლის მიხედვითაც საპატრიარქოსთვის უნდა მიეყენებინათ დარტყმა, ამოქმედეს. თუ ვინ ამოქმედდა ეს გეგმა, ამაზე პასუხი რომ გავცეთ, მეტი ინფორმაციაა საჭირო. ვის აძლევს ხელს დღეს ქვეყანაში არეულობა? ვინ უტევდა ბოლო წლების განმავლობაში ყველაზე ხშირად ეკლესიას? პასუხი ერთია:



„ნაციონალური მოძრაობა“. აქამდეც არაერთხელ მითქვამს, რომ განსხვავება "ნაციონალურ მოძრაობის" და "ქართული ოცნების" სამინისტროებისა და უწყებების აპარატებს შორის, პრაქტიკულად, არ არსებობს. შს სამინისტროს, უსაფრთხოების სამსახურის თუ პროკურატურის, ისევე, როგორც ნებისმიერი სხვა სახელმწიფო დაწესებულების აპარატი ამ ორი პარტიის შეზრდითაა ფორმირებული. ეს ყველაფერი, ჩემი აზრით, "ქართულ ოცნებასთან" ინტეგრირებული "ნაციონალური მოძრაობის" გაკეთებულია", - აცხადებს ექსპერტი ლადო პაპავა გაზეთ "კვირის პალიტრისთან" ინტერვიუში.

"ნებისმიერ სტრუქტურაში, მათ შორის - საპატრიარქოშიც შეიძლება დაუშვან შეცდომები, არსებობდეს დარღვევები, რადგან ყველგან მოკვდავი ადამიანები არიან, მაგრამ ეს ყველაფერი დიდი სიფრთხილით უნდა გამოამჟღავნებულყო. დღეს მიდის ცალ კარში თამაში, ასუსტებენ პატრიარქის უახლოეს გარემოცვას, რაც ძალიან გულდასაწყვეტია. ამასთან, ღრმად ვარ დარწმუნებული, რომ ამ ბრძოლაში დედაეკლესია გაიმარჯვებს! ჩვენში ყოველთვის მცდარი რეიტინგები დგებოდა, როდესაც იკვლევდნენ, ვის ენდობოდნენ ქვეყანაში ყველაზე მეტად. არ შეიძლებოდა, ამ რეიტინგებში ეკლესია ყოფილიყო პოლიტიკოსების ან სახელმწიფო სტრუქტურების გვერდით. ის, რომ ყველაზე მეტად ენდობიან მის უწმინდესობას და მასთან ერთად, ეკლესიას, ბევრს ალიზიანებდა. ნახეთ, ისევ ძველ საკითხებზე წარიმართა დისკუსია, მათ შორის იმაზეც, ეკლესიას უნდა ჰქონდეს თუ არა საბიუჯეტო დაფინანსება. დარწმუნებული ვარ, რომ უნდა ჰქონდეს, ოღონდ ხარჯვა უნდა ხდებოდეს გამჭვირვალედ", აღნიშნავს ლადო პაპავა.

„არ მინდა, დავიჯერო, რომ ამ პროცესში პირდაპირ მონაწილეობდნენ მაღალი თანამდებობის პირები, თუმცა ყველაზე დიდი პრობლემა ის არის, რომ "ქართული ოცნების" დღევანდელი მთავრობის ზოგიერთი წევრი ამკარად არაკომპეტენტურია. შესაბამისად, უჭირთ ამა თუ იმ გამონკვევამე დროული პასუხის გაცემა. ავიღოთ, თუნდაც, ერთ-ერთი ბოლო საკადრო გადაწყვეტილება - ალექსანდრე ჯეჯელავას დანიშვნა ვიცე-პრემიერად. დავიჯერო, ბატონმა კვირიკაშვილმა არ იცის, რომ ჯეჯელავას

დადებითი რეიტინგი კი არა, ანტირეიტინგი აქვს?! თურმე, ჯეჯელავა მთავრობას საზოგადოებასთან ურთიერთობის გაუმჯობესებაში უნდა დაეხმაროს... და როგორ, როდესაც თვითონ აქვს საზოგადოებასთან ურთიერთობის პრობლემა?! ერთ-ერთ ინტერვიუში ვთქვი, რაც მეტად გააკრიტიკებენ ჯეჯელავას, მით მეტ-ხანს შეინარჩუნებენ-მეთქი. აშკარად შევცდი, რადგან ვერ წარმოვიდგინე, რომ მას არათუ შეინარჩუნებდნენ, დააწინაურებდნენ კიდევ!", - ამბობს ექსპერტი.

„საკადრო პოლიტიკა, საპატრიარქოს გარშემო განვითარებული მოვლენები, "რუსთავი 2"-თან და საზოგადოებრივ მაუწყებელთან დაკავშირებული პროცესები და ა.შ. - ეს ყველაფერი ერთიანი პროცესია. **ძალიან სერიოზული ცვლილებების გადაწყვეტილება უნდა მიიღონ "ქართულმა ოცნებამ" და მისმა მესვეურებმა. წინააღმდეგ შემთხვევაში უფრო დამძიმდება ვითარება. როდესაც ქვეყანა შეკრული და ძლიერია, მთავრობასა და პარლამენტში კი, უმთავრესად, სახელმწიფოებრივად მოაზროვნე კომპეტენტური ადამიანები საქმიანობენ, გადაწყვეტილებებიც უფრო სერიოზული მიიღება და ქვეყანასაც ნაკლები ზიანი ადგება. რად გვინდა დიდი მარჩიელობა იმის დასადგენად, რომ საქართველოს დაუძინებელი მტერი ჰყავს, რომლის ტანკებიც თბილისიდან 25 კილომეტრში დგას?! ეს რა, არ ვიცით? პრობლემების მოსაგვარებლად მთავრობას სჭირდება გონიერება, ხალხს კი - კონსოლიდაცია", - ამბობს პაპავა.**

„მამული, ენა, სარწმუნოება" - ეს ფორმულაა, რომლითაც ქართველმა ხალხმა შეინარჩუნა თვითმყოფადობა, სამშობლო. დღეს სამივე მიმართულებით პრობლემები გვაქვს. დავიწყოთ მამულით. სამწუხაროდ, ტერიტორიის 20% ოკუპირებულია; დღემდე სახელმწიფომ ვერ ჩამოაყალიბა თავისი დამოკიდებულება მიწის მიმართ - შეიძლება მისი უცხოელებისთვის მიყიდვა თუ არა? ეს არ არის მხოლოდ ეკონომიკური საკითხი, ეს სახელმწიფოებრივი მიდგომის თემაა, რომელიც ეროვნულ უსაფრთხოებასთან არის დაკავშირებული; ეს უკავშირდება იმას, თუ როგორი გვინდა იყოს ხვალინდელი საქართველო. მეორე პოსტულატია ენა. ჯერ რამდენი ბრძოლა დაგვჭირდა იმისთვის, რომ კანონი სახელმწიფო ენის შესახებ მიეღოთ. ჩვენს სამეზობლოში საქართველომ ეს კანონი ყველაზე გვიან - 2015 წელს მიიღო. მასში ჩაინერა, რომ უნდა შექმნილიყო სპეციალური ორგანო, რომელიც ენის სინშიზის საკითხებს დაარეგულირებდა... ჯერაც არ შექმნილა, რითაც მთავრობამ კანონი დაარღვია, მაგრამ არის კი ვინმე პასუხის მომთხოვნი?! 2017 წლის ბიუჯეტში ასეთი სტრუქტურის თაობაზე ჩანანერი არსებობს, მაგრამ დაფინანსების გრაფაში წერია 0, ანუ არც წელს აპირებენ მის შექმნას! მესამე გახლავთ სარწმუნოება, რომელსაც ახლა შეუტყის. თუმცა დარწმუნებული ვარ, რომ ქართველი ხალხი გაცილებით ძლიერია და ამ დარტყმებს გაუძლებს", - მიიჩნევს ლადო პაპავა.

„კვირის პალიტრა“